

KIRBEPREDIGT 2015

Liebe Leut in onserm scheena Benninga,
s' Jahr isch fascht rom, s'gibt nix zu beschöniga.
Mir hend wieder en Haufe G'schichta zom verzähle,
horchet guat zu, I dua's Eich wirklich stark empfehla.
Doch bevor mir die letztschte Monat Revue passieren,
dend mir aufrichtig onserm Schultes die Seele massieren.
Herzlichen Glückwunsch für Deinen Erdrutsch-Wahlsieg!
Fascht 100 Prozent – ha-no, mir brauchet koi Musikpädagogik.
Auch darüber hinaus gibt's ganz Tolles zu berichten,
in den Neubaugebieten tun sich die Flächen ziemlich verdichten.
Die fertige Kita liegt direkt an der Straße, des isch ned zom Lache,
vom Dach aus könnet die Kids jetzt Verkehrszählung mache.
Onte am Neggr sind die Jahre des Wartens und Leidens vorbei,
die Spaten stachen tief in die Erde und mit großem Bohei.
Sogar der Minischder war da und eröffnete mit großer Geschde,
die Umgehung wird gebaut, bald hat's mehr Platz für pulsierende
Straßenfeschde.
Neben der Kelter entsteht bald a schöne große Piazza,
mit Zugang zum Neckar und hoffentlich südländischer Grandezza.
Der endgültige Entwurf steht allerdings noch aus,
mir hättet da en Vorschlag für Dich, lieber Klaus.
Mir lasset ned logger mit onserer großartigen Idee:
a Boule-Bahn für unsere Alte, des wär was, Mon Dieu!
Nebenan wird des Brückenhaus grad renoviert,
mr könnt glaupe, dass em Flegga tatsächlich was passiert.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

Es wird au mol Zeit für onsera scheene Ortsmitte,
lang g'nug muasstet mir Benninger ja auch drum bitte.
Jetzt send tatsächlich e baar Maßnahme beschlossa,
allerdings: s' Einkaufslädle bleibt weiterhin geschlossa.
A teures Gutachte hend ihr in Auftrag gegäbe
um Eure Ansichte offiziell und formal zu bekläbe.
Dass ä Lädle em Flegga ned sei kann ond ned sei sott,
also muasst d' Oma weiter zom Edeka schnaufe für ihren Kompott.
Ond seit diesem Jahr wisset mir au ziemlich genau,
dass in einer anderen Sache geholfen hat unser Radau.

Des Areal von dr „Krone“ nuff wird tatsächlich saniert,
bald gibt's wieder a zentrale Pinte, des isch garantiert!
A paar Meter nonder hat mr andere, ganz hochfliegende Pläne,
Ortsbeläbung durch Friedhofserweiterung, da kriag i Migräne.
A neue Aussegnungshalle für 190 meist trauernde Gäste,
ond meh Platz für unsere Tote, isch des für Benninga wirklich
des Beschde?
Aber vielleicht hend mir oifache Leit ned g'nuag Fantasie,
als Gemeinde brauchsch emmer Geld, des geht ned mit Telepathie.
Aus lauter Angschd vor vielleicht bald em leere Portemonnaie,
haja! Trauerfeiern für auswärtige Leiche, des wär doch a geile
Geschäftsidee!
Gegenüber vom Friedhof, da steht onser Kirch mit'me ganz neia Dach,
des wär en Grund zum Feira, doch stattdessen gab's Krach.
Kaum, dass sich onser neier Pfarrer guat eing'läbt hat
ischer wieder fort, was war da los, Ihr vom Kirchengemeinderat?
Andere von Euch sind auch schon nach kurzer Zeit
dort ausgeschieden, es gab wohl einen ganz großen Streit.
Jetzt hat die Gemeinde ihrer kirchlichen Salat,
fragt mich, dr Kirbepfarrer, ich steh sonntags gern parat.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

Andererseits hend mir em Ort wirklich ganz große Helda,
em letztsche Jahr war des Phänomen ned grad selta.
Manch einer hat vor seinem Haus Einbrecher vertrieba
ond zwoi Fußballer hend Diebe in die Flucht getrieiba.
Die Helda waret vom TSV, damit send mr schon beim Thema,
dr Verei isch aufm beschte Weg raus aus dem leidige Krise-Schema.
Er stand kurz vor dr Insolvenz, des isch unbenomma,
jetzt hat en neier Vorstand die G'schäfte übernommen.
Dr TSV wird wieder normal, des kriaget se schon hin,
zumal die Ringer überfälligerweise ausgetreten sin.
Fanget als RSV in der Verbandsliga wieder von vorne an,
dr Durchmarsch nach oben, das ist der ganz große Plan.
Zu dem setzet au die Fußballer jetzt grad an,
auf'gstiaga en d' Bezirksliga send se, Mann-o-Mann.
En dr Relegation hend se die Renninger g'scheit rom ond nomg'spielt,
femfnull vom Platz g'fägt, fascht jeden Schuss ens Tor neiziert.

Für Spaß im Ort und ein schönes Sportereignis,
sorgt der Ski-Club mit seinem kleinen Wagnis.
Den Sommer-Biathlon als Event zu etablieren
und ons die luschiedige Sportart schmackhaft zu präsentieren .
Noch dazu hat der Verein mit aller Kraft und großen Mühen,
unten im Schwarzwald, ganz nah bei den gefleckten Kühen,
im letzten Jahr viel Zeit und Anstrengung damit verbracht,
sein Skihütte zu renovieren und hat sie auf den neuesten Stand
gebracht.
Es gibt noch einige mehr, die hier wieder viel Gutes getan,
dr DRK ond dr Arbeitskreis Asyl fallet ons ein, ganz spontan.
Doch mir könnet ned bloß über onser friedlichs Benninga schwätza,
sondern müsset nausgucka über dr Tellerrand ond andere Schauplätzla.
D' Welt isch aus de Fuga, s' isch ned zom verhehle,
überall schiaßet's ond bombet, de'n hetze ond krakeele.
Hass und Gewalt, immer meh werdet emmer brutaler,
Ond egal, was de sechsch und duasch, s' wird emmer fataler.
Schlagworte langet, meh brauchsch gar nemme sage,
om zu beschreiba, was isch wirklich kaum zu ertrage.
Ukraine und Syrien, Nigeria, Irak und Afghanistan,
dausende Oschuldige sterbet, WAS hend die eigentlich WEM getan?
Dr Terror macht scheins nirgendwo wirklich mehr halt,
em Internet zeigt d' ISIS Videos von brutalster Gewalt.
In Paris schiaßet se luschtige Zeichner grausam en d' Gruft,
in Ankara jaget se friedliche Demonstranten genauso en d' Luft.
Im arabische Raum kämpft bald jeder gegen jeden,
Millione rennet om ihr Läba bis ganz nuff nach Schweden.
Doch die feige ond zynische Anstifter ond Spießg'selle
bleibet verschont ond krallet sich an ihre exponierte Stelle.
MACHT wellet se no' meh oder ihre jetzige krampfhaft behalte,
über Tausende von Leiche gehet se, sie d'en schalte ond walte.
Ob Putin, Assad oder die ISIS-Mörderbande,
was des soll? Aus onsrer Sicht ischs ned zu verstande.
En Passagierflieger schiaßet se nonder, ohne Skrupel ond G'wissa,
mit seine Lüga hat dr Putin d' Welt am laufende Meter b'schissa.
En dr Ukraine herrscht Chaos ond Mord ond Hunger ond Krieg,
a liadrichs Waffestillstände war dr einzige diplomatische Sieg.
Die freie Welt isch ratlos, ned mol die Amis hend wirklich en Plan,
was sollet se au do, grad send se raus aus Irak ond Afghanistan.
Dr nächschde Einsatz müsst sei am Bode in Syrien ond gege dr IS,
wer will sich des antun, die nächschte Stufe von dem Gewaltexzess?

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreibta.

Kataschrophe gab's au bei ons en Europa in große Dimensione,
en Co-Pilot fliegt Oschuldige en Tod ond s' Land in Depressione.
A Flüchtlingsswelle aus dr halbe Welt schwappt uff onsern Kontinent,
viel Freiwillige hend ganz viel zom doa – ond zwar permanent.
Die Oine ziaget Grenze mit Stacheldraht im Affenzahn schnell nuff,
andere lasset Flüchtling nei, die send ned so krass druff.
Doch über allem fehlt, ond des macht wirklich große Sorge,
gemeinsames Handeln, damit's friedlich bleibt, heut und au morgge.
Dabei hemmers erschde Debakel em Jahr grad no so verhindert,
die Grieche waret pleite, aber hend jede g'scheite Idee behindert.
Fascht hätt's den Grexit gäbe ond se wäret aussem Euro nausg'floga,
dr Tsipras hat sich uff dr letzschte Drücker doch no verboga.
Ganget die Griecha den Grexit, geh'n die Briten ihren Brexit?
Folget die Franzose mit m' Frexit ond die Spanier mit m' Spexit!
Kämet die Tscheche mit m' Tschechix ond die Öschis mit m' Öschtrix!
Na dät i aber austräte mit meim ganz persönliche Ego-Euro-Exit.
Dann dät i mein Gartenzaun no en Meter in d' Höhe nuffziaga
ond mei Hondle zom bellende Grenzposchte omerziaga.
I dät Visa verlange, en Zoll ond biometrische Date,
vom indische Bofroscht und meiner Putzfrau von de Karpate.
I dät Norme erfinde ond Gesetze erlasse,
könnt Brüssel omkehrt mit meiner Weltsicht befasse.
Dahanne in Benninga wär i mein eigener Präsident
ond mach „Legalize it“, des wär wirklich e Happy End!
Dr Grüne Cem hat's grinsend vorgemacht,
auf Facebook vor seiner erheiternde Balkon-Pflanzen-Pracht.
Des war ä Statement gemäß seiner Gesinnung,
mol oin durchziage! Da käm so manch anderer zur Erkenntnis-
gewinnung.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreibta.

In onserer Regierung herrscht heillooses Durcheinander,
in der Koalition haltet sie kaum noch wirklich zueinander.
Die Flüchtlingsfrage droht selbst die Union zu entzweien,
Angie hüben und Seehofer drüben: Wer will sich da von wem befreien?
Sie diskutieren und sie lamentieren,
doch davon tun nur die ganz Rechten profitieren.
Se hoißet AfD, Pegida ond send herzlos wie Frigida,
soviel Rechtsruck im Volk war seit Weltkrieg 2 noch nie da.
Es wird o-a-g'nehm und bei soviel Hassparole,
nehmet's manche Idioten wörtlich und d'en unverhole.
Unterkünfte anzünde und Flüchtlinge attackieren,
ond versuchet gar, Helfer und Politiker zu massakrieren.

So deutlich miaßet's mr's sage, ganz ohne falsches Gefühl,
s' steht grad verdammt viel auf onserm europäische Spiel.
Ziemlich guat gange ischs de meischte von ons in all den Jahre,
vielleicht hemmer z'guat g'lebt, ond miaßet bald für andere viel spare.
En Saus und Braus d'en viel zu viele dahanne feischt läbe,
als wär's selbstverständlich, en Mangel wird's scho koin gäbe.
Mr muass bloß mol nach Zürich ond zur FIFA nomgucka,
die zynische Fußballgängschder könnt'sch bloß no beschpucka.
Milliarde om Milliarde d'en se scheffle, verschiabe on sich zustecke,
dr Fußball benutzet se für Korruption, ond feige d'en se sich no
verstecke.
Doch die US-Justiz hat richtige Mittel und Gesetze grad no g'fonda,
die Funktionäre aus ihre Suite en ihre Polizeiwäge feschdbonda.
Ned wirklich richtig fasse kasch aber den g'schickta Blattersepp,
lässt alle ufflaufe und dreinschauen als wäret se dr letschte Depp.
Aber au sei Macht isch vielleicht nemme lang gewährt,
die Sponsora sottet aussteiga, so was hat sich emmer scho bewährt.
Doch om ois komme mehr nemme drom nom, des isch sonneklar,
a Fußball-WM in dr Gluthitz bei de Ölscheichs von Katar.
Damit des Weltgekicke ned mit der Adventszeit kollidiert, da driaba,
muss dr Papschd jetzt Weihnachte uff dr Hochsommer verschiaba .

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

Die Handball-WM hat Katar ja au schon mit viel Schodder an sich
g'rissa,
faschd gwonna hätt ihr Söldnertrupp au des no, soweit hend so
na doch ned b'schissa.
S' dauert nemme lang, na d'en se au bald die Ski-WM ausrichte,
mr könnt's ihnen zutraue, en dr Wüschte e alpine Klimazone zu errichte.
Sieba Jahr isch no bis zur WM in dem stenkreiche Scheich-Emirat,
vorher kicket se no en Russland, des war au so en FIFA-Verrat.
Dass alles tatsächlich stattfindet, s' isch wohl kaum zu vermeide,
doch wenn's om dr Fußball goht, miaßet mir Schwoba scho viel länger
schwer leide.
Wenn des so weitergoht mit onserm g'liebta Vau-Eff-Bee,
no ischer bald in dr Oberliga, ond onsr TSV empfängt ihn mit großem Olé.
Ohne dr Schdeevens hätt's en des Jahr scho en Stock tiefer natrage,
uff dr letschte Drücker hend se's g'schafft, doch ned ganz zu versaga.
Em Sommer hemmer na dengt, jetzt geht's wieder nach obe,
en Bruddler als Trainer ond en seriöser Manätscher in feiner Garderobe.
Die Chefs davor hend dilettiert und dr Verein fascht heenich g'schpart,
viel verbessert hat sich bis heit aber ned viel beim neue VfB DUTT-gart.

Mir schwäbische Fans kommet dennoch grandios uff onser Koschde,
Alex, der Zornige, schempt öffentlich über seine kickende Vollpfoschta.
Küsschen, Küsschen für dr jong Werner wars Highlight seiner Pädagogik,
wm Tabellekeller isch Sarkasmus wohl die einzig wirkende Logik.
Mr wünscht em Zorny, er sprengt über sein Schatte emol drüber,
allerdings wär's dem oin oder andere trotzdem viel lieber.
Dr Alex fliegt naus und mit der nächschte Verbindung en'd Schweiz,
Dort verzählt er em Blatter auf sei Art ond Weis, om wie viel sozialer
isch doch onsr scheener schwäbischer Geiz.
Da trifft er vielleicht au all die andere Lichtgestalte,
die seit Jahren des Bild vom heilige DFB erhalte.
Dr Kaiser, dr Niersbach, dr Fuffz'ger ond wie se alle heiße,
dr Emm-Vau hat sich rechtzeitig begäbe auf sei allerletzschte Reise.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

Mir Deitsche send ja groß em moralische Gosch-Uffreiße,
send emmer die Gute, die niemals bescheiße.
Sommermärchen dend mir feire ond bestimmt ned kaufe
ond onsern Diesel, den kannsch bestimmt wie Quellwasser saufe.
Für ons brechet g'rad wirklich heile Welte zamme,
onser scheene WM gekauft? Ja hend die no alle Tasse beisamme?
Dr Kaiser Franz wirft donkle Schadde vor lauter waggel uff seim Soggel,
ond dr Rescht vom DFB krächzt ommenander wie en voll-kaschdrierder
Goggel.
Au onserm ewig laufende Volkswage geht's grad an dr Krage,
Abgaswerte vom Diesel hend se g'fälscht en d' Welt naustrage.
Ond jetzt isch au no onser geliebte Wurscht am G'sondheits-Pranger,
Lensa, Spätzle, ohne Saite? Wie soll des en meim Ranze nondergange?
Mir lasset ons trotzdem dr Spaß ond die Dekadenz ned vermiesia,
wengleich die Sinnhaftigkeit von so mancher Aktivität no ned bewiesia.
Mr dend bloß no Poaschda, Twitträ, Inschdagrämme ond Whatsäppe,
mit onre Smartphones en de Griffel säh'n mr aus wie ferng'steierte
Däppe.
Älles, was zom Lebä heit no brauchsch,
also: Labern, Pimpfern und stets en volle Rausch,
hasch uff dr Leinwand, em Netz odern Wisch-Wisch-Display
Ond lernschs bei „Fack ju Göthe“ ond „Fifty Shades of Läder-Grey“.
S' isch so dermaße viel bassiert in Zwei-Dausend-Fuffzehen,
dommerweis war des meischde ned wirklich nett und wunderschön.
Zom Glück krieg i ned alle Kataschtrophe in der Predigt komplett onder,
däd i alle Theme tangiera, kämet mr heit nemme zom Neggar hinonder.

Deshalb hör i jetzt uff ond hör Euch alle zum Abschluss laut schreie:

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

AMEN